

939

Stephanus Rex Pol.

Gorsii Jacobi: Orationes
gratulatorias

Orat. in off. Lazari. 1582.

Am. IV. D. 175

PANEG. et VITAE

Polon. 4^o

N^o. 939.



4465

CIMELIA

Cimel. IV. d. 135.

30
D. IACOBI GOR-
SCII ORATIONES
GRATVLATORIÆ,

Apud Sereniss: Regem Polonię STEPHANVM
Batoreum, diuersis temporibus habitę,
quatuor.

*His adiuncta est in Calce quinta, ad Illustrissimum &
Magnificum, D. Ioannem Zamoscium,
Cancellarium Regni, &c.*



CRACOVIAE,
Anno Domini: M. D. LXXXII.

BIBLIOTH. UNIV.



JAGIELLOŃSKI

Cim. Qy. 4465

AD SERENISSIMUM
REGEM POLONIÆ STEPHANVM
*Batoreum, in quatuor orationes gratulatorias,
apud eundem ipsum Regem victorem
et triumphatorem,
habitas,*

IACOBI GORSII PRÆFATIO.



VAM, INSIGNES VICTO-
riæ, résq; post conditum hoc regnum
Poloniæ, arduæ & difficiles à M. vestra
gestæ, voluptatem & lætitiâ nobis,
Serenissime Rex, attulerunt; eam te-
meritas quorundam, libertatis, vt illi
dicunt, hominum studiosorum, vt autem nos sentimus,
inuidentiâ æstuantium, turbauit. Videmus enim, vide-
mus, quorsum libertas ista hominum istorum feratur:
videmus, quas insidias veræ libertati, à maioribus no-
stris nobis relicta, tendat. Specie libertatis, isti, tuen-
dæ, libertatem ipsam omni libertate exuere conantur:
ac Rempublî: virtute & sapientiâ maiorum nostrorum
bene fundatam euertere contendunt. Neq. enim, si ista
eorum libertas, vel potius effrenata licentiâ, se diutius
iactauerit, libertati vllus relinquetur locus: nunquam
enim libertas præsidîs spoliata, vlla in Repub: consiste-
re potuit. Præsidia autē libertatis sunt domi leges, foris

A ij

verò

verò arma : legibus aduersus domesticos veræ libertatis oppugnatores munimur ; foris arma aduersus hostes , in seruitutem nos asserentes , induimus. Vbi nec arma contra hostem fuerint , neq. domi leges aduersus temeritatem ciuium suam vim obtinuerint ; ibi nullus libertati , quam isti plenè concrepant buccis , locus esse potest. Depositis armis , hostis in inermes pro sua libidine grassatur , & tanquam pecus in seruitutem abducit. Quod nos cum aliàs sæpe , tum verò relicto ab Henrico Valesio , quem regem in locum Augusti demortui ceperamus , regno relicto , ita esse experti sumus : cū nemine regni fines defendente , proluuies illa Tartarorum Rusiam inuasisset , ac tot millia hominum , de libertate , tum intempestiuè nobis disputantibus , in seruitutē abduxerit , totamq. Turciam captiuis nostris , cum summo regni nostri probro , repleuerit : quo eodem tempore impudentes quidam , ciues dicam an latrones domesticos , legum authoritate euersa , & laxatis cupiditatis suæ frænis , quàm grauius regnum vexauerint , fortunasq. nostras diripuerint , pacis vinculum , ius & humanum & diuinum turbauerint , ac quantū in illis fuit , omnem libertatem , quam crepare nunquam cessant , euerterint , quæ scelera patrauerint , quas cædes commiserint , quam vim ingenuis hominibus intulerint , quam impudenter in vicinos suos grassati fuerint , ne illū grauissimum dolorem nostrum refricē , dicere prætermitto. Agnoscit certè M. vestra , causis criminibusq. cognoscendis , quæ libertas tum nostra , libertatis istius nouæ,

nouæ , & maioribus nostris ignotæ, propugnatoribus
grassantibus fuerit. Quorum audaciam, ac in omne fa-
cinus effusam temeritatem, quoniam repræssio hoste, qui
ceruicibus nostris imminebat, M. Vestra resistere con-
tendit, vtrumq. genus veræ libertatis præsidiorum M.
vestræ conantur eripere. Nam & neruo belli pecunia,
quæ in hoc regno è tributis semper colligebatur, te ex-
spoliatum, hostibus obijcere cogitant: & quod hostis ne
optare quidem, nedum sperare auderet, regnum illi i-
nerme, & omni præsidio nudum, deuastandum expo-
nunt, & vltro ad calamitatem nostram eum prouocant:
& quod non pauci proditores fraude sua perficere non
potuerunt, isti apertè faciunt. Quid enim est regem ar-
mis exuere? præsidia regni tollere? quàm hostes ad in-
uadendum regnum inuitare? Arma sunt regni salus:
armatus princeps, vel solo nomine hostem còercet: Ar-
ma tua, Sereniss: Rex, animusq. inuictus, & Moschum
ad pacem petendam venire, & prouincias, aut fraude
occupatas, aut per vim ereptas restituere còegit, & ali-
os in officio continuit. Qui fama rerum à M. V. gesta-
rum ita conterriti; vt prædarum quas impunè agebant,
obliti, domi & intra suos fines se contineant. Quod si isti
nouæ libertatis nostræ propugnatores cogitarent; si
grati diuini huius beneficij, quod solo te rege, consecu-
ti sumus esse vellent; omnes suas fortunas tibi in eum
vsum, & regni salutem, vltro offerrent: nec eorum virtu-
ti, quorum consilijs & laboribus non solùm libertatem,

sed vitam etiam ipsam retinent, inuiderent: teq. potius
in hostem signa ferentem sequerentur, quam, inter im-
mania illa sua pocula, virtuti & tuæ, & tuorum, detrahe-
rent, nec tuam impressionem retardarent. Genus ho-
minum & beneficiorum ingrati, & publicæ salutis infe-
stum. Qui idem, ne domi pacem componas, ne scelera-
tos iusto supplicio mactes, suis importunis clamoribus,
ac omni æquitati inimicis legibus suis, te impediunt: ma-
nibus sacris M. vestræ, ne & oppressis opem feras, & fa-
cinorosis supplicia merita irroges, libidiniq. eorū om-
nia iura ac leges permittas, manicas iniiciunt. Vnde fit,
vt cum libertatem se tueri patroni isti noui clament; li-
bertatem prorsus euertant: armis enim quæ foris hostē
cōdercent ereptis, & legibus, quæ pacis vinculum sunt,
libertatisq. alumnæ euersis, quid est, quod amplius spe-
remus? quam libertatem retineamus? & hosti, & dome-
sticis grassatoribus præda facti. Quod cum apud ani-
mum nostrum reuoluimus; acerbo dolore cruciamur:
ac non solum libertatem nobis; sed etiam vitam ipsam
nostram ac regni salutem eripi iudicamus: vsumq. eorū
fructuum & ornamentorum, quæ diuina tua virtus pa-
rit, istorum scelere eripi nobis vehementer dolemus: di-
gnaq. supplicia eorum audaciæ & temeritati, ne dicam
in patriam impietati, à Deo omnium scelerum vindice
exposcimus. Quorum furor, ne tui animi constantiam
suo loco moueat, non veremur. Videmus te eum regem
esse, quem nullius audacia, nullius potentia terreat: vi-
demus te, non solum non cedere malis, sed semper con-
trā

trà audatiorem ire : contempnisti potentissimi & superbi hostis Mosci minas : fregisti eius animos implacabiles, ac eò deduxisti ; vt nomen tuum non absq. terrore suo audire soleat. Non difficilè & domesticis malis tua ista diuina sapientia occurrens, ac intestinum morbum tua prudentissima medicina sanabis: quas isti tempestates excitant, prudentiæ tuæ cedent, & sua vanitate quæ tumescunt, concident. Vt nunc te triumphantē ex hoste externo cum lætitiâ excepiamus ; ita domesticis tempestatibus sedatis, & fluctibus in capita sediciosorum redundantibus, M. vestræ victoriæ nouam gratulabimur. Nunc externæ huius victoriæ gratulationē à nobis cōscriptam M. vestræ offerimus: & vel hoc vno munere, quod solū præstare possumus, virtutem tuam diuinam, meritaq. in regnum, nosq., omnes honoramus. Sunt autem huius gratulationis de victoriâ Moscouitica tres orationes, quarum vna est in supplicationibus, nunciata nobis pace cum Mosco facta, & Liouonia redita, in Diui Floriani æde, publicè, in vniuersoq. Scholæ nostræ conuentu à me habita : quam duæ in eodem argumento consecutæ, quibus M. vestræ & reditum in regnum incolumem, & victorias tam insignes gratulamur, & plerunq. temeritatem nostrorum hominum, animumq. ingratum, & ornamentorum, quæ nobis S. M. vestra sua virtute parit, & salutis, quæ in tuo præsidio acquiescit, reprehendimus : quibus quarta, qua M. vestram Leopoli in hanc urbem ingressam excepiamus, ac pro nostro officio salutauimus, accessit. Quod munusculum

nusculum nostrum, animiq. nostri ardorem, erga R.
M. vestrā promptissimum, & constantem obseruantiam
erga se, vt M. vestra benignè & prolixè, vt iam aliàs sæ-
pius fecit, à me fidissimò subdito suo recipiat, maiorem
in modum rogo : vt hac animi tui benignitate, dolorē,
quem temeritas aduersus M. vestram & regni salutem
male feriatorum hominum nobis parit, consolemur ac
leuemus. Omnia fausta M. vestræ opto. Cracouiæ, ex
ædibus nostris Collegij Iurisconsultorum.

D. IACO-

ORATIO I.
D. IACOBI GORSCII
APVD SERENISSIMVM REGEM
STEPHANVM, E MOSCOVIA
victoria parta, & pace confecta
Cracouiam reuersum
habita.

BENEDICTVS DOMI-
nus Deus, pater misericordiarum,
& totius consolationis nostræ: be-
neditum nomen eius æternum; qui
desiderio nostro, votisque nostris,
pro S. R. M. vestra toties susce-
ptis, benignè responderit: sollicitos
animos nostros, de incolumitate
M. vestræ, belliq; offensionibus, erexerit, ac summa le-
ticia refecerit: qui M. vestram & incolumem, & mul-
tis, magnisq; victorijs decoratam, & insigni splendentem
gloria, rebus arduis, difficilimisque laboribus quæsitam, ho-
ste potentissimo profligato, multis urbibus eius, & mu-
nitionibus firmissimis, vel expugnatis, vel integris in di-
tionem acceptis, regnoq; nostro, & imperio ipsius adiectis,
Prouincia Liuania, è faucibus tyranni erepta, Reipub:
nostræ, quod nunquam post conditum hoc regnum accide-
re potuit, adiuncta; in regnum primùm, deinde legibus pa-
cis,

cis, publica comitiorum auctoritate confirmatis, iustitia
 iamdudum hinc exulante, in suas sedes reuocata, contro-
 uersis ciuium cognitis, sceleratis hominibus debito suppli-
 cio affectis, iure suo cuiq; reddito, religione, nostris moribus
 & audacia pressa, & si non plenè suo iuri restituta, recre-
 ata tamen, in hanc urbem, & M. Regiæ scdem, & literarū
 alumni, quæ M. V. in hoc regnum venientē primū ex-
 cepit, dominum suum magna cum lætitia salutauit, in sede
 Regia locauit, corona decoris, & æternæ gloriæ, perpe-
 tuūq; honoris adornauit, triumphantem ac spolia opima ex
 hoste superbo refferentem, pro sua in nos singulari benigni-
 tate, deduxit: ac toti regno, in tam illustri loco, victorias
 tuas, de co a tua trophæa, ac triumphos tuos, splendoremq;
 gloriæ tuæ, ab omnibus spectandum constituit. Vnde cum
 omnes, qui sunt regni huius incliti alumni, & veri ciues,
 voluptatem immensam capiant; tūc verò nos, qui rei li-
 terariæ in hac urbe curam suscepimus, qui non minus in
 M. vestra, quàm imperatorias artes, reiūq; militaris sci-
 entiam admiramur ac suspicimus, præcipuè percipimus, ac
 plenè sensibus haurimus, & quod literarum contemptori-
 bus obijci à nobis possis, habemus. Inualuerat opinio illa
 Barbaris hominibus innata; literarum studia, ociosis ho-
 minibus propria esse; nihil ad res magnas gerendas, Rem-
 pub: administrandam, adiumenti afferre; imò potiùs inge-
 nia rebus gerendis apta retardare. Quam opinionem S.
 M. vestra egregiè suo clarissimo exemplo refutauit; atq;
 contrà, quàm isti sentirent, literarum studia, eruditio-
 nemq;

laudat à
 China.

nemq; veram, & principibus viris dignam, & domi Re-
pub: bene administranda, legibus conformandis, pace tu-
enda, iustitia conseruanda, ac ciuibus in officio continen-
dis, & in bellis gerendis, disciplinaq; militari ad victori-
conuertenda, non modo auxilia magna prestare, verum
enimvero absq; eis, nihil rectè, nihil commodè, nihil deco-
rè, & domi pace regenda, & foris hoste comprimendo, &
victorijs comparandis, egregium confici posse, demonstra-
uit. Nam, si interdum rudes literarum, rudes rerum à
condito orbe gestarum, & qui infantium instar, quid, an-
tequam nati fuerint gestum sit, ignorant, aliquid non re-
prehendendum egerint, victoriam ex hoste retulerint; id
non eorum virtuti & prudentiæ, verum fortunæ temer-
ritati, quæ in rebus humanis non paruam vim habet, ac-
ceptum ferri debere, viri magni semper iudicarunt: qui
tum demum beatas Respub: & imperia stabilia fore cen-
sebant; cum ea eruditi viri, vetustatis peritissimi, ac om-
ni genere bonarum artium exculti gubernarent. Quod
iudicium sapientissimorum virorum, S. M. vestra, &
verissimum, & Rebuspub: utilissimum, suo clarissimo e-
xemplo demonstrat: ac voces barbarorum, qui literas
à rebus gerendis semouent, & principe in Republica
viro indignas, temerè pronunciant, reprobant. Do-
cuiisti enim sapientissime, & inuictissime REX, &
rebus indubitatis demonstrasti, literarum ac bonarum ar-
tium studia, in omni genere Reipub: & imperij, & insti-
tuendi, & regendi præsidia, maximam vim habere: &

B ij

cos

sine literis non
bene administrant
Respub.

Repub felices.

literarum studia
maxima vim
habent.

eos commodè, & domi in pace Rempubli: administrare, &
 bella gerere, qui illis opibus bonarum artium instructi fu-
 erint; qui sapientia, quæ literarum est alumna, pectora
 exculta ad res gerendas attulerint; qui, rebus à maioribus
 gestis, res suas, temporibusq; vetustis, sua tempora confer-
 rent, atq; inde, quid consequens esset, elicerent: & quæ
 offensiones vitandæ, tum domi, tum foris, & in bello ge-
 rendo essent, quæ exempla imitanda fuerint, prouiderent.
 In quo genere, Serenissime Rex, quoniam facilè primas
 partes inter rerum moderatores, & imperiorum guberna-
 tores, teneas, à primo in hoc regnum ingressu, magnas res
 aggressus, felicissimè, & optato euentu conficis: ac regnum
 hoc, multis iam annis, vel inscitia, vel temeritate, ac ne-
 gligentia principum virorum corruptum, & ad omne in-
 solentiæ, audaciæ, & temeritatis genus perductum, in suū
 ordinem reducis; legum cancellos, & iustitiæ repagula,
 audacia nostra plusquàm barbarica effracta, reparas: & ad
 eam moderationem, quæ à sapientissimis, optimis, & pien-
 tissimis principibus expectatur, reuocas: audacium conatus
 comprimis: rapinarum impetum retardas: impietatem ex-
 plodis: pietatem, scelere multorum vel perturbatam, vel
 conculcatam, & tantum non planè extinctam excitas, &
 suæ integritati restituis: aras euersas erigis, CHRIS-
 tum Iesum Dominum nostrum, tot contumelijs in hoc re-
 gno, (quod quædam sentina hæreticorum & improborum,
 e toto orbe Christiano proscriptorum, factum est) affectum
 tua singulari pietate placas: faciemq; eius, tot blasphemijs
 detur-

Laus Regis
 à iudicare gestis

deturpatam ac sordidatam, pientissimis tuis lachrymis la-
uas: ornatumq; suis illis paternis vestibus, quibus impia
hæresis, satellitumq; sathanæ improbitas cum exuerit, in
suo illo æterno folio, a Deo patre sibi dato, locas: vineam,
quam ille plantauit, quam sanguine suo irrigauit, extur-
bandis apris illis ferocibus, qui eam deuastarunt, exornas,
ac omni factu pietatis, & virtutum instruis, maceriaq; in-
uicta tuæ Regiæ authoritatis munis, & impietati occludis:
pace cum vicinis composita, rebus ciuilibus rectè constitu-
endis, ac controuersis inter ciues componendis, totum stu-
dium intendis; ut sublato foris bello, contentiones dome-
sticas, & intestinum malum, è corpore Reipubli: euellas,
neq; deinceps mutuis inuidiæ vulneribus, ciues tuos se cõ-
ficere permittas. Quod cum effeceris, cum dissidentes,
& mutuo odio deslagrantes ordines, ad concordiam redu-
xeris; & nobis, ciuibus tuis salutem, & M. Tux imperium
florens, regnumq; inuictum paries: ciuium enim consenti-
ens voluntas; & Reipub: salus est, & principis sui robur
& ornamentum. Neq; enim illi probandi sunt, qui tum
demum imperium Principis felix esse fabulantur, eiusq;
authoritatem & potentiam tum maximè vigere asserunt;
cum ordines ciuium discordia, & mutuis odijs, ac etiam
armis se appetant: propterea, quod vires Reipub: diuersis
studijs destructæ, infirmiores libertati suæ tuendæ, & prin-
cipi resistendo fiant. Quod quidem tyrannis illis, qui ciui-
um libertati, fortunis, ac ipsæ etiam vitæ insidias molun-
tur, persuasum esse, & utile videatur, S. R. M. vestræ

B iij

Principi,

Irulan

Concordia.

Principi, & Domino clementissimo, & regni, quod rece-
 pit gubernandum, propagatori, ac patri benigno, prebari
 non potest: non enim minuire libertatem nostram, non pri-
 uare nos fortunis & patrimonijs nostris, non perdere nos;
 sed augere, ornare, felices, & omni genere fortunarum
 opumq; auctos, incolumes, ac florentes reddere contendis:
 totumq; studium, omnes conatus, omnem regiam authorita-
 tem, omnia consilia, curas, & cogitationes eo confers; ut
 nos una cum regno, discordijs nostris, cæterisq; vicijs con-
 sauciato, primum sanes, vulnera eius alliges, deinde flo-
 rentissimum, & omni ex parte beatissimum reddas: hæc
 una voluptas M. vestræ fuerit, si nos omni genere for-
 tunarum, regnumq; concordia, pace, & opibus firmatum
 relinquas. Quæ quidem cogitationes M. vestræ inuictis-
 sime Rex, tantumq; studium Reipub: nostræ exornandæ,
 ciuium beatorum reddendorum, religionis, & pietatis tan-
 ta cura, non aliunde promanat, quam ex fonte illo bona-
 rum artium, & humanioris doctrinæ, quam non summis
 tantum labris M. vestra, ut multi solent, attigerit; ve-
 rum enimvero totum illud, quicquid in eo genere laude di-
 gnum, quicquid moribus conformandis, barbarici extin-
 guendæ, virtuti fouendæ, Reipub: gubernandæ, ciuibz
 regendis, imperijs administrandis, utile & aptum sit, to-
 tum exhauserit. Artes ingenuæ, studia literarum, &
 Philosophiæ, ab ineunte ætate suscepta cum, ijs omnibus,
 quæ in M. vestra elucent, virtutibus, & regni tanta
 dexteritate gubernandi te ornarunt, rebusq; magnis, &
 omni

Studium,
 cura,

& cetera ex domi-
 na.

omni memoria, laude, & gloria dignis, idoneam reddiderunt; & sapienter imperandi, artes, rationesq; tibi demonstrarunt; tēq; et sapientissimum Reipub: gubernatorem, & summum hac ætate imperitorem, illisq; maximis principibus, quorum memoria toto orbe terrarum nunquam lucere cessat, parem reddiderunt. Et equidem magna ea sunt, quæ de Scipionibus Romanis, qui à Poeta fulmina belli appellantur, memoriæ mandata sunt: magna, quæ magnus Pompeius gessit: maxima & admiranda, quæ Iulius Cæsar toto orbe terrarum patruit; quibusq; gestis perfecit, ut suum nomen, quicumq; magni imperitores videri velint, etiam apud ipsos barbaros appetant, Cæsaresq; appellari contendant: cum quibus, tua quæ geras, nisi invidiam, quæ genti Polonæ non insolens est, metuam, pari lance conferrem, demonstraremq; illos tam potentes, tam victoriosos principes, si vel illi in tam inops, & ab omni apparatu rerum gerendarum vacuum venissent regnum, resq; eas, quæ à M. V. cū tanta dexteritate geruntur, agere vel-
lent; nunquam tibi pares futuros, nullamq; rebus gerendis in tam perturbato, & ab omni copia imparato regno, gloriam sibi comparaturos fuisse: vel si M. tua in tam opulentam Rempub: opibus è toto orbe terrarum congestis, tot legionibus civium, tot, tantisq; sociorum, & amicorum præsidij firmatam, tot, & tantis exercitibus, & ea rei militaris disciplina roboratam, venisset, & imperij habenas in ea accepisset; non dubium fuerit te multo maiora gerere potuisse; nec pauciores, inferioresq; triumphos, quàm
illi

Scipio.

Pompeius.

Iulius Cæsar.

Victoriosos
principes.

illi consecuti fuerint, consecuturum fuisse. Magna sunt
 illa, quæ illi gesserunt; sed magnis opibus Reipub: instru-
 cti, ad ea gerenda accesserunt; cum M. vestra vix inue-
 nerit, unde seipsam cum necessarijs vitæ tuendæ mini-
 stris sustentare posset. Nulla certa arma, nullam pecuniâ,
 nullos neruos gerendi belli, nullam deniq; disciplinam &
 militarem, & ciuilem, in hoc reperit regno. Et quanquam
 ita imparatos ab armis, ita inopes à pecunia nos, & discor-
 diæ insolentiæq; plenum regnum inuenerit; nihilo secius
 ad res maximas gerendas, socias urbes parere, M. vestræ
 recusantes, ad officium præstandum reuocandas, hostemq;
 superbum, & toti regno excidium, post tot victorias mi-
 nitantem, omni cunctatione remota, statim animum ver-
 tit, hostes sumptis armis profligauit, ad officium socias ci-
 uitates reduxit, quæ maiores nostri, aut alijs occupati bel-
 lis, aut per ignauiam suam, rerumq; gerendarum imperi-
 tiam, cum summo suo probro, & regni dedecore, totos cen-
 tum per annos, hosti cedendo amiserant, intra triennium
 recuperauit: dedecus illud nostrum, virtute summa, tot vi-
 ctorijs partis, tot urbibus ex hoste vel receptis, vel peni-
 tus euersis, absterxit; rei militaris gloriam nobis reddidit,
 ac in possessionem eius nos restituit. Obsessa Pleseouia, vr-
 be totius Moschouie & munitissima & amplissima, ita ho-
 stem terruit; ut nihil præter fugam, & latebras, palu-
 desq; cogitaret: omnes eas condiciones, quas à M. ve-
 stra oblatas, superbè ut solet, reiecerat; vltro deinceps &
 cupide appeteret. Uniuersa Liuonia, quam pluribus an-
 nis,

Vi il Reu regent
 in hoc regno.

rei militaris glori-
 am reddidit

nis, prælijs multis, copijsq; innumeris in eam infusus, nõ si-
ne magno impendio, et suorum sanguine multo quæsierat et
occuparat, cederet: quam & si omni genere cõmeatus, omni
rerum copia instruxerat: firmissimis præsidijs munierat: ac
sibi, ut res ipsa erat, persuaserat, neminem tam potentem,
tam ab armis et exercitu instructum inueniri posse; qui vel
minimam eius regionis urbem expugnare, capereue posset:
non solum enim omni genere commeatus & armorũ, copia
militum fortissimorum, ac fidissimorum ciuiũ numero, Im-
peratorumq; rei militaris scientia florentium, eas vrbes mu-
nierat; verũ etiam omnem aditum in ea loca, qua adire
possent, obstruxerat: tamen omnia illa, tot laboribus, tot
impensis, tot offensionibus belli, mortibusq; suorum quæsi-
ta, mutato ne dicam, an verò abiecto animo, depositaq; illa
tyrannica arrogantia, qua conditiones honestas reiiceret,
M. Vestræ tradidit: præsidia deduxit: arma, quibus mu-
nitiones instruxerat, reliquit: nihilq; inde, quod bello ge-
rendo, & hosti propulsando, necessarium esset, asportauit.
Ita factum, ut non solum prouincia, & urbibus munitis-
simis, arcibusq; machinarum bellicarum copia instructis,
M. Vestræ cederet; sed etiam arma omnis generis, ad-
uersum seipsum traderet. Quid est autem, quod tantũ per-
timuit? cur in aciem non descendit? cur totam rem in di-
scrimen non deduxerit? cur intra munitiones, suos se con-
tinere præceperit? nec paribus viribus in certamen descẽ-
dere eos permiserit? Non equidem illi tam terribilem exer-
citum, armaq; M. Vestræ fuisse, qui & armorum copia

mortibusq;

C

abun-

Prudentia
Deusitas
Constantia

Obsequio
Polociam

Uicisti. calu.

famem.

abundaret, & militem innumerabilem et multis annis bello gerendo, & laboribus continuis duratum haberet, credendum fuerit; quàm prudentiam: quàm in rebus & tentandis & perficiendis dexteritatem: quàm in tollerandis rebus constantiam, animumq; pericula omnia contemnentem. Virtutem ille tuam, fortem animum tuum, summamq; sapientiam, ac belli gerendi peritiam pertinuerat. Vidit M. vestram, nihil temerè, nihil fortuito aggredi: omnia prouidere, ac consilijs sapientissimis, omnia quæ ageres, munire: semel obsessam urbem continuo urgere: nec ullis iniurijs cœli, & temporum, quæ magnam vim expugnandis exercitibus habet, nec comeatus inopia, nec armis hostilibus, te ab obsessa urbe depelli posse. Dederas illi tuæ perpetuæ constantiæ, & animi inuicti documentum; cum primum Polociam obsidione cinxeris: unde te, neq; fames, neq; continui imbres, & tempestates, cœliq; ulla iniuria, nec soli obscœnitas, cœnumq; illud, in quo, ne equi quidem robustissimi consistere possent, neq; manus illa, suorum selectorum militum, quos omni genere armorum, et comeatus instructissimos, in eam munitionem deduxerat, depellere poterint. Viciisti, inuictissime Rex, apud eam urbem, non solum exercitum & præsidia Moschi; verum etiam cœlum ipsum, tempestates ipsas, atq; illam, quæ viscera militum, fortissimorumq; virorum perurat famem, rerumq; inopiam. Cum pluribus hostibus tibi eo in loco bellum erat: ex urbe præsidia erumpebant: milites tui, omni genere tormentorum, globisq; ferreis appetebantur: cœli ruina, imbresq;

80
bresq; assidui super caput assistebant, ac in militem, hosti
arma inferentem, desceuebant: qui ne liberè in hostem fer-
rentur; pedes eorum cænum illud obscœnissimum moraba-
tur, & quasi pedicæ virtuti eorum injiciebat, & impro-
ba fames insultabat. Quæ tu tamen omnia constantia tua,
animiq; inuictò robore superasti. Urbem illam munitissimâ,
parte eius ignibus consumpta, in deditiõem recepisti, ac
possessionem eius regno tradidisti: ignauiterq; amissam re-
gionem illam totam, magna virtute, & animi robore, ho-
sti ereptam, nobis restituiisti: ac Moschi præsidia, arcèsque
eius inexpugnabiles, expugnari posse docuisti: nihilq; tam
munitum, tam arduum dari posse; quo virtus non perrum-
pat, quod animus constans non euincat, demonstraisti. Ca-
pta ea urbe, putabat hostis te belli curam prorsus depositu-
rum fuisse: tum quòd Polociam regni Poloniæ nuper oc-
cupatam prouinciam recepisses, & non leuẽ gloriam ea
victoria apud tuos quæsiuisses, & hac una victoria, vt
maiores nostri, qui in eandem regionem cum exercitu mit-
tebantur, ac una munitiuicula expugnata, victoriosissi-
mi, intra duos tresue menses, domum, exercitu dimisso, re-
currebant, ac suas res gestas, plenè tubis canebant, fa-
cere solebant; cum ille statim vt recessissent sua recupera-
ret, ac euersa firmitus multò muniret; tum quod apud nos,
non nisi viritim collata pecunia, & tributo annuo ægrè
impetrando, stipendia militibus penderentur, nullumq; ali-
um belli gerendi neruum inueniri non ignoraret, & habe-
ret, qui securum se redderent, & nunquam nuncios tribu-

tum annuum dari permissuros, affirmarent, eoque totam rationem M. vestre deductum iri; ut necesse esset M. vestram ob pecunie & stipendiorum inopiam bellum deserre, & ad pacem petendam supplicem venire. Quam & Moschi, & perditorum spes, M. vestra statim inancm fuisse monstravit: contribui pecuniam annuam in stipendia militum oportere, facile omnibus persuasit. Primo vere exercitum ad hostem reduxit: & primo egressu, urbem illam, quæ à venustate & amœnitate conuallium, Magna Prata idem hostis appellare, & ubi per otium deliciari exercitusque suos, tum in Lituaniam, tum in Liuoniam, quasi è portu quodam immittere soleret, igni in munitiones iniecto, expugnasti: præsidarios milites, partim ob ingratum animum, quòd Polocia capta, liberalissimè à te dimissi, in eam arcem se receperant, ac pertinacissimè exercitui nostro restiterant, occidisti, partim captiuos abduxisti. Qua urbe eversa, & munitionibus nouis ex tempore erectis, præsidioque firmo munitis, ad alias urbes, arcesque tum ipse exercitum duxisti, tum Ioannem Zamscum, virum prudentissimum, cui imperij gubernacula commiseras, ad interiora eius regionis misisti: accius strenua opera, valdidissima propugnacula, arcesque & naturam locorum, & arte Moschouia munita, ac ex omni parte obfirmata, cepisti. Quam constantiam, et in gerendo bello dexteritatem, cum Moschus, qui nostrum arma semper contemnere soleret, M. vestre videret; ad pacem petendam, non nihil animum flexerat: iudicabat enim sibi non cum illis, qui tertio mense

copijs

copijs dimissis, domum reuolabant, rem esse; verum cum
eo Rege, & eo Imperatore, qui nullam vim extimesceret:
qui iniurias, & cœli, & locorum contemneret: qui totos
& integros annos, in bello persisteret, respiciendiq; sibi tem-
pus non daret, & continuò omnia igni, & ferro, peruasta-
ret. Verum enimuero, cum conditiones pacis iustas, aut da-
re, aut accipere pro sua illa barbara arrogantia nolet, pri-
orq; ad pacem petendam legatos mittere recusaret; M. ve-
stra, imperato plurium annorum tributo, cum tantis copijs,
& tanta vi, in eius regionem redijt, ac caput regni sui Ple-
scouiam obsedit, muros eius quater non destitit, ac magna
parte eorum machinis deiecta, irruptionem in eam urbem
tentauit, ac omnia pauore repleuit. Quod Moschus cum
videret, variè affici, & animum iam huc, iam illuc fle-
ctere cœpit: maxime, cum non solum Plescouia oppugnaretur;
sed etiam per totam suam regionem, milites omnia ferro
& igni peruastarent: ipsiq; Moschouie urbi, quæ se-
des eius tyranni est, imminerent: unde ille, cum ignes suis
vicis, & municipijs iniectos, non sine terrore & lachri-
mis hauriret; opes suas in eas munitiones, quæ Candida
palude, ut illi vocant, circumluuntur, doportari curabat;
mox ipse eodem fugam arrepturus, ac se in paludes illas,
ranæ instar, coniecturus. Interim tamen consilia meliora
cepit, pacem petere instituit, ac quas M. vestra conditi-
ones ferret, recipere constituit, totaq; prouincia Liuonia
decedere decreuit. Ad quæ consilia, ut descenderet, per-
tinax studium M. vestræ obsidionis continuandæ, ac in

ranæ instar in
Paludes.

castris hybernandi, cum impulit. Nam cum ille æstate ex-
acta, hybernis tempestatibus, ac immenso illo frigore, quod
in illis desuiat locis, & non humana modò corpora, sed et
beluarum etiam perurat, desuicentibus, M. vestram ne-
cessariò in hyberna exercitum abducturam, obsidionemq;
urbis illius soluturam putaret: neq; enim unquam in ani-
mum inducere potuit, M. vestram hyemis asperitatem, ni-
uiumq; illam altitudinem, quæ omnia obrueret, tollentu-
ram: ac non modo cum hoste armis, verum etiam cum hye-
me, imbribus, niuibuscq; assiduis ac frigoribus, omnia u-
rentibus, & vix intra tecta tollerandis, sub papilione de-
pugnaturam, maturiusq; ex illis locis excessuram: & quod
armis efficere ipse non posset; temporum incommoda, et ini-
uriæ cœli efficere facile posse arbitrabatur; ut interim
urbem ad futuram obsidionem omni genere commeatus atq;
armorum communiret, præsidia submitteret, ut frustra de-
inceps oppugnaretur. At cum vidisset nouum genus ob-
sidionis continuandæ M. vestram instituere, pro papilioni-
bus solida tecta, domosq; multorum capaces militum crige-
re, ac in castris urbem locare, incommodis hybernis occur-
rere, & quasi arma aduersus hyemem, niuiumq; & imbri-
um incommoda, frigorisq; violentiam, tecta ipsa instruere;
obstupuit: nec amplius de pace petenda, Liuiamq; quæ
belli suscepti causa esset, dimittenda, terguicr sandum esse
statuit; Legatos ad M. vestram mittit: conditiones pacis
non tam fert, quàm accipit: ac deinceps omni genere offi-
ciorum, & humanitatis potiùs, quàm armis, cum M. ve-
stra

stui certare decreuit: ut quoniam armis imparem se esse
M. vestræ agnosceret; officijs amicitiae, & omni genere
obseruantiae, erga M. vestrum, si non superior, par tamen
reperiretur, nec se in eo genere vinci pateretur. Mul-
tum enim princeps ille, tui animi robur, & constantiam,
in semel suscepto bello continuando, & prudentiam in ge-
rendo, adminatus est. Et quanquam tyranni virtutem
oderint; ipse tamen seipsum hinc vicit: ac ut tuas tam in-
signes virtutes, omni genere obseruantiae et honoris colat,
amet, & obseruet, sibi persuasit. Itaq; de M. vestra sem-
per honorificentissimè & sentit, & apud omnes homines,
loquitur. Tui ingenij vires, in rebus agendis prudentiam,
felicitatem, ac dexteritatem, summis laudibus extollit. Cu-
ius animi eius, cum plurima & certissima argumenta pas-
sim se offerant, tum verò legationes, & M. V. ad eum, et
illius ad M. vestram; quæ non nisi animum eius M. ve-
stræ studiosum & obseruantem monstrant. Vicisti igitur
Serenissime Rex, armis bellum, humanitate tyrannidem,
constantia temeritatem, ciuilitate barbariem: & hostem,
amicum tui obseruantem, reddidisti: omniumq; principum
animos, in te conuertisti: opinionem eorum de te immuta-
sti, ac ut te, & regno, & imperio amplissimo, suaq; amici-
tia & obseruantia dignum iudicent, effecisti: & quæ sub-
sidia, studia literarum, artiumq; liberalium, quas fideliter
didicisti, ad res magnas patrandas, bella difficilia geren-
da, pace & iustitia inter ciues conseruanda, afferant; tuo
vnius exemplo clarissimè docuisti: Barbaras voces, lite-
rarum

rum studia damnantes, refutasti: nostros animos, quibus
res literaria credita est, crexisti, ac calcar iuuentuti, studia
amplectenti, & ultrò currenti, admouisti. Vident enim,
quæ præsidia Philosophiæ, & puræ eruditionis, in omni
genere rerum gerendarum, sint: vident absque eis nihil
commodè, & institui, & agi, & ad finem optatum perdu-
ci posse: vident rerum rudes animos, omnia quæ agant,
temerè, & aggredi, & agere, & temerè cæpta, temerè dese-
rere, nusquam constanter consistere; & quæ audacter or-
si fuerint; aut timidè persequi, aut inconsultè relinquere.
Quorum ineptis sententijs, artium bonarum importuna re-
prehensione, repudiatis, ad M. vestræ exemplum, tota se
componit, ac deinceps componet, barbara, rudisq; rerum ge-
starum esse nolet. Magnum igitur nobis fructum tua vi-
ctoria peperisti: hostem compressisti: amissa maiorum negli-
gentia recuperasti: opiniones barbaras, & studijs literarum
inimicas, euertisti; ac nouas opiniones in animos tuorum
infudisti: inimicis terrorem iniiecisti: omnium animos in te
uertisti: ac regnum diuino munere tibi datum confirmasti:
nosq; tutos, ac securos à barbarorum rapinis reddidisti: reli-
gionem abiectam erigis: Christum in suam possessionem re-
ducis, iura, legesq; æquisimis sententijs tuis confirmas, &
alia plurima ornamenta nobis, regnoq; attulisti. Quibus e-
numerandis nunc prætermisis, & iusto volumini reserua-
tis, eò, unde digressus sum, & unde orationis huius ini-
tium sumpsisti, redeo, atq; dico: Benedictus Deus noster, be-
neditum nomen eius. Primum, qui te talem regem nobis
dedit:

dedit: deinde, qui post multa pericula, è bello diuturno &
gravi, non incolumem modò, verùm etiam, tot, & tantis
victorijs potitum, fortunis & prouincijs auctum, gloria
insigni, & æternum celebranda, rebus maximis gestis parta,
decoratum, in regnum primùm, deinde in hanc ciuitatem
M. Vestræ sedem, & literarum nutricem, triumphantem
deduxit: ac in tanta luce hominum virtutes tuas, trophæa
tua, & triumphos tuos, omnibus spectandos proposuit. Be-
nedictus Deus sit, qui te puerum suum, ut aquila pullos
suos in alis suis portat, neminem inimicorum regnumq; tibi
nocere permittit: qui non modò regio honore te ornauit, in-
ter principes terræ locauit, ad amplissimos honoris, & im-
perij gradus extulit; sed etiam de hoste superbo, & cuius ar-
ma orbis terrarum pertimuerat, cuius nomen, potentia, o-
pes, admirationi in omnibus regnis erant, victoriam insi-
gnem dedit: regnum tuum firmavit: tot, tantisq; virtutibus
pectus tuum exornauit, ac tanquam alterum David reli-
gionis erigendæ, iustitiæ conservandæ, pacis, pietatisque
firmandæ, ministrum elegerit: & cum principem esse vo-
luerit, cui, cum dilectissimo suo rege David, ijs benedicat
verbis: Posui adiutorium in potente, & exaltaui electum
de plebe mea: Inueni Stephanum seruum meum: oleo san-
cto meo unxi eum; manus enim mea auxiliabitur ei, &
brachium meum confortabit eum: nihil proficiet inimicus in
eo; & filius iniquitatis non apponet nocere ei: & concidā
à facie ipsius inimicos eius: & odientes eum, in fugam cō-
uertam: & veritas mea, & misericordia mea, cum ipso:

D

& in

Et in nomine meo exaltabitur cornu eius: Et ponam in mari manum eius, Et in fluminibus dexteram eius: ipse inuocabit me, pater meus est, Deus meus, Et susceptor salutis meae: Et ego primogenitum ponam illum, excelsum præ regibus terræ: in æternum seruabo illi misericordiam meam, Et testamentum meum fidele ipsi: Et ponam in seculum seculi sedem eius, Et thronum eius, sicut dies cæli. Quod totum ut fiat, Et M. V. perpetuum sit, eum ipsum Deum patrem, per filium eius vnigenitum dominum nostrum Iesum Christum, rogamus: ac nos, una cum re literaria nostra, patrocinio M. vestræ committimus.

D. IACO-

ORATIO II.
D. IACOBI GORSCII
EODEM TEMPORE
QVO SUPERIOR,
scripta,



*ET SI SEMPER DEVS OPT:
Max: benignitatem suam, erga hoc Re-
gnum, remque publicam hanc nostram,
Sacra R. M. Domine, Domine clemen-
tissime, multis & certissimis argumentis
declaret; nunquam tamen illustrius, hanc
bonitatem suam, curamq; nostri singularem demonstravit;
quam tum, cum serenissimam M. Vestram, amotis cæteris
principibus, summa contentione gubernacula, huius nostræ
navis, in qua iam dudum periclitamur, appetentibus, talem
tantumque virum, regem nobis dederit: cuius prudentiam
omnes mirarentur: iustitiam, pietatemq; venerarentur: au-
toritatem reuererentur: dexteritatem rerum gerendarum
admirarentur, legum stabiliendarum, pacis constituende,
ac totius regni huius, vitijs nostris, audacia nostra, et im-
pietate hæreticorum deformati, ac planè dissoluti, studium
reformandi, & concordia ordinum roborandi, exoscula-
rentur: quem hostes timerent: cuius amicitiam vicini om-
nes expeterent: cuius res gestas, & robur animi inuictum
laudarent, & in cuius præsidio, incolumitas nostri, et Rei-*

D ij

publi:

publi: totius, ac religionis Catholicæ salus acquiesceret: in
cōp., tota vt in firmissima basi collocata, nullus tempestates
extimesceret, omnia pericula contemneret. Quæ equidem
nisi hoc firmamento M. Vestræ niteretur, nunc consistere
nulla ratione, nec in suo statu permanere posset: tota, vel li-
bidini ciuium improborum, vel prædæ hostium, impunè in
nos grassantium, exposita esset, nihilq; præter ruinam im-
pendentem, prospectaret. Quod malum, Deus, vt pro sua
illa in omnes immensa bonitate & misericordia à nobis a-
uerteret; S. M. Vestram, tot, tantisq; virtutibus virum
ornatum, principemq; inuictum, regem nobis, nihil tale me-
rentibus, ne dicā reluctantibus & inuitis, dedit: et tanquā
gregi diserto, rabiaq; luporum, cum externorum, tum do-
mesticorum conuulnento, pastorem, nostrorumq; vulne-
rum medicum prudentissimum imposuit. Quod nisi factum
fuisset, nisi nos pereuntes diuina bonitas respexisset; nul-
lam omnino salutem iam sperare nobis licuisset. Tanta enim
maiorum nostrorum hominum publicæ pacis ac religionis
orthodoxæ obseruantissimorum, disciplinæ dissolutio facta,
tanta quiduis audendi potestas nata, tanta incrementa,
progressusq; impietas fecit; vt nulla vi Respub. hæc no-
stra, tanta facinora sustinere valeat: nulla ratione ita fir-
mari possit; quin mole tanta scelerum præsa, præceps tota
feratur, nihilq; aliud præter ruinam nobis ostendat, inuicq;
Dei nobis, & supplicia merita denunciaret. Tot hæreses in
hoc regno exarserunt, quot ab initio mundi, hostis ille acer-
bus Ecclesiæ Christi, prosceminauit. Quicquid impietatis
toto

toto orbe terrarū exoritur; in hoc Regnum tanquā in sen-
tinam defluit. Non securi modò sunt inter nos, qui è toto
Christiano orbe prosligati, nomen Dei blasphemant, qui
filium Dei servatorem nostrum contumelia afficiunt, fu-
roremq; diuinum in nos concitant; verū etiam muneribus
ornantur, præmia sceleris amplissima refferunt, omniq; ho-
nore impictas eorum exornatur; ita, qui in extremas insu-
las & orbis terræ desertas regiones putidæ naui impositi,
deportari merentur, principem locum inter nos & fortu-
narum, & honorum tenent, nobisq; aperte vt victores in-
sultant, captiuos, & nodis impiæ suæ doctrinæ constrictos
ad triumphum Sathanæ tradunt: ô miserum regnum! ô per-
ditam securitatem nostram, & infamiæ nostræ, & iræ
Dei, ruinæq; nostræ impendentis, calamitatem! quam non
solū non fugere; verū etiam vltro accensere nostris dis-
sensionibus acceleramus. Quid comitia nostra? quid conten-
tiones nostræ? quid legum omnisq; iuris, & humani, & di-
uini contemptus? quid legitimi magistratus despectio sibi
velit? quid aliud agunt, quā vt maturiūs cum tota Re-
pub. pereamus? Cui morbo nostro, nisi M. vestra medicas
manus admoueat, insaniam nostram & deseuientis morbi
tantam materiam è corpore Reipub. amoueatur, & ex visce-
ribus nostris extrahatur; nulla spes deinceps salutis nostræ se
offerre nobis poterit; nequicquā aliorū opem implorabimus:
sola M. vestræ prudentia ista diuina animusq; hic inui-
ctus, & nostra, & totius Regni incolumitas est, ac medi-
cina morbi nostri præsens; tuæ M. nostra vulnera, à Deo

impia putidæ na-
ui imponendi.

D ij

Patre

Patre misericordiarū sananda, & legibus pietatis alligan-
 da, commissa sunt. Cuiusquidem salutis, incolumitatisq; no-
 strae, iam (quod felix, faustumq;, & Sacrae M. vestrae,
 & nobis omnibus, & Regno uniuerso sit) egregia, & nul-
 la vi ventura submouenda fundamenta, non multis ijs à
 suscepto Regno annis posuit: primūmq; socijs ciuitatibus, pa-
 rere M. vestrae nolentibus, & iudicium Dei ipsius, &
 Regni totius consensum de M. vestra negligentibus, ad offi-
 ciū reuocatis; deinde hoste superbo, et tot tantisq; successibus
 feroci, armis fracto, prouincijs iam olim amissis recupera-
 tis; Liuania Regno adiuncta; tot munitionibus hostilibus,
 vel captis, vel euerfis, vel in ditionem acceptis; tota penē
 Moscouia ferro, & igni vastata; Plescouia constantissimē
 oppugnata, & magna ex parte propugnaculis nudata, ho-
 steq; ad pacem petendam coacto: quid deinceps expectare de-
 beamus; M. vestra demonstrauit. Securi in omnes partes à
 vicinis sumus: nemo est, qui contra M. vestram temerē
 arma sumat; qui non M. vestram, aut non veneretur, aut
 non metuat. Tartari intra fines suos, fama rerum à M. ve-
 stra gestarum, & armorū splendore conterriti se continent:
 & praedandi illam effusam licentiam in Regno nostro sibi
 ereptam, vehementer dolent: vt nihil inde iam periculi me-
 tuamus: nullas tempestates ab oriente sole expectemus: lu-
 cem pacis inde oculis nostris vltro se inferentis hauriamus.
 Quid nisi domestica & intestina mala nos perurgerent, nisi
 interna vis, caedes, rapinae, omnia perualetarent, nisi reli-
 gio, Christi q; gloria, tantū periclitaretur, nisi iustitia tam
 acerbē

Moscouia
 Plescouia

acerbè premeretur, nisi audacia, impietas religionis, & Dei contemptus, crudelissimè, & ita impunè in viscera Reipublice defseueret, si suū quisq; ius teneret; magnū bonū, nō pœnitendī felicitatē hanc nostrā iudicaremus: nihil plane nobis ad benè beatēq; viuendum M. vestra regnante deesse gauderemus, ac summam voluptatem, maximōsq; fructus inde caperemus. Sed planè nobis id accidit, quod diuitibus ægrotis solet, qui cū omnium rerum & fortunarum copia abundant, nullo incommodo externo premantur, morbo tamen interno, et intra sua viscera vigente vrgentur, ac externæ illius beatitudinis fructus nullos percipiunt; ita enim & nos cōmodis his & fructibus, quos vbertas diuinæ virtutis tuæ profundit, vix ullo modo frui possumus. Adimit nobis omnem eam voluptatē, omnia illa commoda, morbus intra viscera Regni defseuiens. Non possessiones modò, non fortunæ tantū, non hereditates nostræ, à maioribus relictæ, ad hæc vsq; tempora propagatæ, priuilegijs communis, dilacerantur, rapiuntur, vexantur, & tantū non igni, ferroq; quo vno, mala nostra ab hostili crudelitate differunt, peruasiantur; sed etiam libertas nostra, existimatio nostra, ne dicam vita etiam ipsa nostra, in periculum eorum temeritate vocatur. Nemo est, qui, quod habet, se habere existimet: qui se vsquam securū esse putet; præter istos, qui omnia miscent: quibus omnia impunè licent: quorum furori, ac libidini, omnia nostra, fortunæ nostræ, possessiones nostræ, vita deniq; nostra exposita est: qui nullis legibus parent, nullum legitimū Magistrum agnoscunt: qui omnia

omnia diuina, ac humana, pro libidine vexant ac miscent: qui religionem Catholicam explodunt, noua & impietatis plena dogmata inferunt, Sacramenta calcant, cærimoniae sanctissimas irrident, Deo ipsi & Christo seruatori nostro insultant, & omnis impietatis propagatores, patroniq; sunt: qui inter ordines discordias serunt, leges impias, & iustitiæ, iurisq;, & diuini, & humani pestem conscribunt: fœderibus suis inperniciem, non modo Ecclesiæ Catholicæ, verum etiam totius huius Regni, & suam ipsorum, se armant: qui sacro ordine in ordinem redactò, bonis Ecclesiæ direptis, pontificia autoritate conculcata, iurisdictione, & omni autoritate principibus Ecclesiæ exspoliatis, senatu toto contempto, & sua dignitate, autoritatèque nudato, in M. vestram furentes impetum faciunt, ac planè in ordinem eam cogunt: imperium, quod semper sanctum, & inuiolatum stetit, M. vestræ adimunt: manibus tuis istis inuictis, quarum vim hostis potentissimus sustinere nequeat, *Catena conf. emp.* manicas & catenas suarum confœderationum irijcere contendunt: iuris dicundi, sceleratos puniendi, disciplinæ maiorum reuocandæ, religionis auitæ stabilicndæ, pacis, tranquillitatis, & iustitiæ tuendæ, omnem potestatem eripiunt: bonis consilijs aduersantur, ac ut furiosi in M. vestram debachantur: nihilq; aliud cogitant, nihil agunt; quàm ut perturbatis ordinibus, & autoritate senatus conculcata, Ecclesia euersa, & omnibus suæ libidini subiectis, M. Regiam impunè & securius aggrediantur, oppugnent, & euertant: imperium ipsum ad se traducant: Anarchi-
amq; in-

Anarchia.

amq; inducāt : totūq; regnum pro libidine sua primū di-
uexent, eneruent, omni dignitate & opibus exspolient, de-
inde penitus euertant, memoriāq; nominis gentisq; Polo-
norum aboleant. Neq; enim credibile est, in tanta, tamq;
effusa improborum hominum audacia euersis legibus, ex-
spoliato sua dignitate & autoritate toto senatu, religionis
metu excusso, Regia M. labefactata, omnium scelerum,
rapinarum, cædium, stuprorum, impietatis ac libidinum
impunitate data, & præmijs tantæ temeritati & audaciæ
amplissimis expositis, bonis oppressis, iustitia & legibus euer-
sis; Rempub. stare diutiùs posse. Nam quod furibunda ista
audacia putat, suis perditis istis consilijs firmari eam, & li-
bertatem illam, quam plenis buccis, & furorem expuman-
tibus concrepat, retineri posse arbitratur; multum falli-
tur: & hosti iter ad occupanda omnia parat, & præmolitur.
Tyranni cuiuspiam, isti libertatis nostræ propugnatores,
ministri & satellites sunt; quorum labor est unicus; ut
Republ. perturbata, Senatu exautorato, M. vestra exar-
mata, & suæ libidini subiecta, toto Regno, omni præsidio,
& consiliorum rectorum, & armorum exspoliato, impieta-
te conuulnerato, catenas furoris sui iniiciant, ac vinctū
libidine sua, Tyranno, ceruicibus nostris iam dudum mi-
nanti, tradant, memoriāq; omnem gentis suæ aboleant,
& pro Christo Machometum recipiant; filium Dei à Pa-
tre auulsum cælo expellant, legesq; Deo Patri ferant, ne
unquam filium suum unigenitum parem sibi agnoscat, ut
infra creatas res eum locet, omniq; pietati, castitati, iusti-
E tie

tie, omni illo cœtu sanctorum è suo Regno exturbato, cœ-
lum claudat, suamq; impietatem, suas cædes, sua scelera,
stupra, peccandi impunitatem pro illis adoptet, regnaq; sua
illa amplissima, & beatissima furori eorum subijciat: ut eo
ipso Deo suis dolis, suæ impiæ doctrinæ cathenis alligato,
cum principe suo Diabolo, in aula cœlesti se iactent, ac licen-
ter in omnem pietatem debacchentur. Hi sunt Serenissime
Rex, istorum conatus, hæc consilia: quibus nisi Sacra M.
vestra maturius occurrat, nihil est, quod ruinam nostram
sustineat. Intestino tanto malo occurrendū, morbusq; visce-
ra Regni exurens, à corpore nostro depellendus. Nihil il-
la externa cōmoda, nihil de hoste extra Regni fines seuic-
te, victoria nobis profuerit; si domi-virtutis, iustitiæ, reli-
gionis Catholicæ, & omnis pietatis probitatisq; hostes, in
nos desueant; ac omnem iustitiam, non modò humanam,
verum etiam diuinam euertant; cædes impunitas, stupra,
adulteria, rapinas patrent; leges, pacis vincula, contem-
nant; seditionum instrumenta confederationes conficiant;
senatum despiciant; religione, & Catholica Ecclesia euer-
sa, in ipsam Regiam M. qua salus Regni continetur, impe-
tum faciant; in ordinem M. vestram redigant; metum
omnem abijciant; quicquid libuerit patrent; nulla religione
Dei, nulla reuerentia M. Regiæ teneantur, ac Ecclesi-
am Catholicam, Sathanæ synagogam, & meretricem omni-
um libidinum, carnificemq; & omnis cædis & sanguinis
ministrum reddant; ac Regnum hoc amplissimum, à maio-
ribus nostris viris pientissimis, & æquitatis, pacisq; obser-
uantissimis

nantissimis, virtute conditum, opibus auctum, iustitia & legibus confirmatum, pietate roboratum, à M. vestra victorijs celeberrimis, rebusq; pro salute nostra egregie gestis decoratum, cætum latronum à se redditum, prorsus euer- tant. Quorum audaciæ, impudentiæ, temeritati, & tan- tæ impietati, si M. vestra maturius occurrat, si temporiùs periclitanti Reipub. subueniat; iustitiam, religionem au- tam, pacemq; nobis restituat, & nostras fortunas, liberta- tem nostram, vitam deniq; nostram conseruabit: Regnum ab interitu impendenti liberabit: suam autoritatem & M. asseret, ac omnibus tempestatibus depulsis, feliciter ac æ- ternum celebranda gloria regnabit. Nam vt nunc sunt res nostræ, vt hominum nonnullorum audacia & temeritas; nulla cum dignitate in tam excelsò solio sederis: nunquam dignitatem M. & imperij retinueris: nullum honorem, tot tantæq; virtutes tuæ, sapientia ista diuina tua, tanta in re- bus aggrediendis animi fortitudo, tanta in agendo dexteri- tas, in perseuendo constantia, in laboribus perseuerantia, molestijs exhauriendis patientia, tibi parere poterit: inglo- rius, & improbitati obnoxius istorum vitam agas, necesse fuerit. Quæ voces istorum aduersus M. vestram exau- ditæ proximis comitijs, qui impetus in leges, in religionem Catholicam, in te deniq; ipsum Regem fieret, M. vestra cognouit. Non isti Regem te Srenissime princeps esse suū statuunt, non tuo sapientissimo, æquisimo, & sanctissimo imperio subijci volunt; sed vt autoritate M. vestræ, vel potiùs regio nomine, quod solum M. vestræ relinquere co-

E ij

nantur,

nantur, ad libidines suas abutantur, quod certè consilium
suum, & conatus istos improbos suos voces illorum prodi-
derunt, cùm dicerent: Eò Rege nobis opus fuerit, cui nos,
non verò ille nobis, imperemus: quod est dicere, cuius no-
mine ad libidines abutamur: qui cupiditatibus nostris ser-
uiat: quem quo velimus impellamus: unde velimus abdu-
camus: quem quando velimus Regno amoueamus: cum
quo libere agamus, ac ei si quidpiam iuste & legitime decer-
nat, obsestamus, & absq; vlllo metu, pudoreq; nostro dicamus:
At qui nos tua decreta non recipimus, & nisi quod libidini
nostræ adlubeat, decernas, statuas, atq; mandes, non pare-
bimus: nostrum est imperium, nostra gubernacula: quid-
quid lubet, licet nobis; quæ vera nobilitatis libertas est: ne-
que volumus, vt nomine tuo Regio rei citentur, tuâue au-
toritate ad comparendum apud iudices cogantur, aut ad
causam dicendam euocentur: nos mandabimus, euocabi-
mus, ac de toto illorū negotio, quod nobis libuerit, non quod
leges tuæ istæ velint decernemus: satis est quod tuum istud
regium nomen usurpabimus, ita scribentes, & dicas confi-
cientes, regnante Stephano, nos Proceres mandamus. Quæ
vox istorū, quàm impudens, quàm scelerata, quàm in M. V.
contumeliosa; nihil dico. Non regem hoc est esse, nō imperiū
gerere, nō regnare, sed perpetua ignominia ac dedecus, quod
nulli ingenuo ferendum est, et honor, contumeliosus potius,
quàm honorificus. Nihil isti pro sua nō ferenda impudentia
M. V. præter Regni nomen relinquunt: omnem potesta-
tem, omnia iura, & legum decreta, omnia iudicia, ad suam
libidinem

libidinem trahunt : hoc enim unum agunt, vt M. vestra,
verbo magis, quàm re ipsa imperium tenente, impunè o-
mnia, & humana, & diuina iura calcent, iustitiam & pie-
tatem profligent, Senatū euertant, libidini suæ effrenatæ
inseruiant, ac tuum nomen perpetuo dedecore afficiant,
seruitutisq; nouæ & inauditæ regibus & principibus no-
tam inurant : nec dissimile regnum tuum esse volunt, quàn
illorum fuerit, quorum regna in tragædijs referuntur, qui
nihil præter personā principis præseferunt : quorum vt di-
ximus, si maturiùs audaciæ occurras, si regni habenas ar-
ctiùs attrahas, potestate tua legitima & Rege Stephano
digna contra istorum furorem utaris, in ordinem effrena-
tam eorum audaciam redegeris, frenos tantæ licentiæ &
impudentiæ inieceris, ad officium debitum, legum obseruan-
tiam, pacis & concordie inter ordines conseruandæ, stu-
dium adduxeris, religionem Catholicam, sceleratis artibus
eorū, et impietate oppressā, erexeris, Ecclesiā Catholicam li-
bertati suæ, fortunis suis, et dignitati suæ, restitueris, ac sa-
thani viribus euersum regnū Christo Domini reddideris, et
regnū tuū firmabis, et tū demū victor eris, verosq; & æter-
nos, victi istorū improbitate, triumphos ages, tutus, ac Deo
dilectus, vt ille Sanctissimus vir David, regnabis, tuæq;
diuinæ virtutis, iustitiæ & veræ pietatis coronas, à Deo
omnium honorum remuneratore recipies, regiumq; hoc de-
cus, tibi diuinitus oblatum, nulla reprehensionis laze nota-
tum eternitati transmittes. Quorum omnium, vt curam
suscipias, ac nos nostramq; hanc Ecclesiam, in qua corona

*decoris ornatus fueris, imperij gubernacula apprehenderis,
possessionem regni adieris, tua Regia M. complecti & tu-
eri digneris, maiorem in modum rogamus, ac pedibus tuis
Regijs aduoluti supplices petimus.*

D. IACO-

D



tis
cor
pos
dem
gra
lum
tar
rem
voc
supp
met
rit,
citi
esse.

ORATIO III.

D. IACOBI GORSCII PRO VICTORIA REGIS STEPHANI EX MOSCHO

PARTA.



I, QUANTVM IN PERICVLO ET
tempestate belli, aliarumq; calamitatum
homines trepident, opem & auxilia Dei,
diuorumq; omnium implorent, tantum vi-
ctoria de hoste parta, tempestate, & flucti-
bus periculorum sedatis, solēq; tranquillita-
tis reducto grati, & diuinę bonitatis, cuius ope & miseri-
cordia, quam in discrimine, & imminentis interitus metu
positi implorassent, memores esse velint; non minore equi-
dem contentione, non remissione studio ad supplicandum,
gratiasq; publicē agendas Deo, salutis suę & Reip: inco-
lunitatis auctori, concurrerent; non minū ardentī animo al-
taribus admoti, diuinas laudes canerent, bonitatē eius, amo-
rem eius erga se & auxilium pręsens celebrarent, passimq;
voce sublata prędicarent; quam tū, cū in periculo essent
supplicare, ad arasq; flentes hęrere solerent. Sed quoniam
metus et pręsens periculum vehementiū oculos nostros v-
rit, quā pax reddita delectat; in illo vehementes & solli-
citi, in hoc remissi & negligentes sumus. Quod equidem ita
esse, & gentium, & populi Dei exempla plurima docent.

Ingresso

Ingresso cum exercitu in Italiam Duce Pœnorum Annibale, omniaq; igni & ferro peruastante, tot exercitibus, tot imperatoribus Romanis cæsis, armis hostilibus urbe cincta, quid populus Romanus terrore illo excitus non fecit? quæ præsidia non quæsiuit? Dies & noctes lachrymis profusis, manibus in cælum extensis, voceq; elata, Deorum præsidia ac opem implorabant: supplices cum uxoribus & liberis ad aras Deorum hærebant: ac se, urbem, Italiamq; tanto discrimine & bello liberari precabantur: & eo nomine vota assidue faciebant. Digresso ex Italia Annibale, & quiete Italiæ reddita; nemo inueniebatur ex ijs, qui gratias Dijs, aut priuatim, aut publicè agendas moneret. Adcò, inquit Titus Liuius, homines sunt bonorum negligentes; ut ne aducnientem gratiam benigni accipiant, nedum ut præteritæ satis memores sint, qui erant in metu supplices, qui undiq; præsidia quærerent, periculo liberati, Deorum suorum obliti. Populus ille Dei, qui Israël dicebatur, gens electa Dei, semen ipsius Abraham, imminente à tergo hoste, cædemq; atrocissimam spirante, à fronte verò mari Erythræo, progressū, fugamq; prohibente, terrore impendentis undiq; interitus dissolutus, ac luctu perditus, cum, quò se verteret, non haberet, ad Deum Patrum suorum conuersus, manus vocemq; tendens, lachrymas profundens, bonitatem eius ac potentiam infinitam, qua patres suos texerit, è multisq; & varijs periculis & discrimine liberauerit, neminem illis nocere permiserit, & tanquam pullos suos aquila in alis suis portauerit, magno cum gemitu implorabat:

rabat: neminem enim è tanto discrimine se posse eripere videbat, præter ipsum, qui cælum, terramq; condidisset Deum: cui tamen liberati, & illo, quod ab Rege Ægypti præsens instaret eis, vitæ discrimine erepti, mariq; ipso cedente, & transitum aperiente, in tutum deducti, non solum nõ reddiderunt debitum honorem, verum ut ingrati, & beneficij in oculis omnium hærentis immemores, ad idola versi, Deum seruatorem suum reliquerunt, & ad iram prouocauerunt; ut planè se ingratisimos, tot tantorumque beneficiorum Dei demonstrarent. Ita qui metu venientis mali excitati, in sinum Dei confugerent, in eiusq; præsidio acquiescerent, securitati redditi, ingratisimi in eum fuerunt, neque debitum honorem gratijs ei agendis reddere curarunt; propterea quòd acrius mala, quàm bona homines sentiant. Quibus ne nos etiam similes esse videamur, cum Moyse, & sorore sua Maria sumpto Psalterio, & orationis Cithara, bello grauissimo liberati, hoste ad pacem petendam armis et insigni virtute Serenissimi Regis Stephani coacto, Domino Deo gratias agentes cantemus. Benignè enim nobiscum egit, gloriosam victoriam de hoste sæuissimo, potentissimo, & superbo largitus est. Cantemus igitur domino: celebremus nomen eius, misericordiam eius, & benignitatem sublimiùs & prolixiùs enarremus. Resonet vox nostra, laudes Dei celebrans, in hoc augusto templo, in quod cætum vestrum, & vniuersum studiosorū nostrorum conuentum, ob eam causam aduocauimus: neque enim nos similes esse decet istis, qui diuina beneficia vltro etiam oblata, vel ingra-

F

tissimis

tissimis animis, accipiunt, vel etiam contemnunt, ac clarissimorum hominum egregie res gestas, calumniantur: gratos nos esse benignitatis tantæ Dei, qui hostem superbum ita conterruit, ita animos eius tumentes fregit; ut ne conspectum quidem Serenissimi Regis & exercitus nostri sustinere potuerit, & desertis militibus & munitionibus suis, in latebris paludesq; inaccessas, animum illum fractum totum intulit, nihilq; præter fugam cogitauit, demonstramus. Cantemus igitur Domino: & inuicto Regi nostro, honorem eū, quem sua virtus, & in eo bello gerendo, & tota Republica gubernanda, fortunis nostris, religione auita, vita denique nostra conseruanda, meretur, præstemus. Imitemur populum illum Dei, qui Sauli victori occurrit, Dominum victoriæ largitorem, gratiis ei agendis, & bonitate sua potentiaq; eius immensa celebranda, honorauit: & non solum Saulum regem victoriæ ducem; sed et pastorem abiectum, ob Goliathum monstrosum illum Palestinorum centurionem singulari certamine victum, Dauidem, debito honore ornauit. Non ignoratis, quæ illius populi vox fuerit, quos hymnos cantauerit, quibus encomijs & Saulum, qui vicisse mille, & Dauidem, qui decem millia profligasse hostium dicebatur, celebrauerit. Celebremus igitur & nos bonitatem Dei, & potentiam eius: celebremus Regis nostri in suscipiendis bellis prudentiam, in gerendis constantiam, in aggrediendo hoste animum fortem, in victis tractandis clementiam, in victoria mansuetudinem. Nouæ victoriæ, insperatæ pacis, nuncium accepimus: præter omnium nostrum
opinionem

opinionem, præter expectationem, pacis leges hosti superbo
dedimus: præter spem Liuoniam uniuersam, quam et
armis munitam, copiisq; instructam hostis teneret, recepimus.
Nova lux nobis affulsit. Non solum amissa recuperauimus;
verum enimuero eam prouinciam, quæ toti regno vim sem-
per aut inferret, aut minaretur, in potestatem nostram rede-
gimus, & regni nostri æmulam, Reipublicæ nostræ partem
fecimus, præsidia illi imposuimus: religionem illam Catho-
licam, cuius tuendæ causa, & ab idololatrice olim Litua-
niapropugnandæ, milites celeberrimos, armorumq; peritia,
& pietatis studio, quondam commendatos, in eam prouin-
ciam induxeramus, eorum ipsorum, qui propugnatores esse
debeant, improbitate, et perfidia pulsam, reuocamus, ac suis
sedibus pientissimi Regis nostri Stephani, cura, labore, &
summa contentione locamus: Christoq; ipsi suam possessionem,
in qua se hæreticorum doctrina recens iactabat, reddimus.
Quo nomine gratias Deo patri misericordiarum acturi con-
uenimus. Exurgat igitur inter nos psalterium illud decem-
chordarum David, quo ille & Dei laudes, & populi sui vi-
ctorias, vario genere symphonie & carminis descriptas,
canere non cessabat. Exurgat nunc eius hæc diuina cithara:
exurgat omnis symphonia eius, & victoriam Serenissimi
Regis nostri Stephani, vnâ cum misericordia & beneficio
immenso Dei patris, & Filij eius Christi Iesu, in hoc cœtu
uestro personet. Quid verò cantabimus? Cantate, inquit
David, Domino canticum nouum: cantate & psallite no-
mini eius. Quamobrem ô diuine Rex cantemus? quamobrè
psallamus?

psallamus? Quia res, inquit magnas, & admiratione dignas gessit: quoniam sua dextera, sua virtute, & brachio potentiae suae, & Regem vestrum cum toto exercitu seruauit, victoriam vobis largitus est, & tyranni vires non solum minitantis, sed etiam inferentis arma regno fregit, supplicemq; Serenissimo Regi vestro esse compulit, pacem petere, leges datas capere, ereptas regiones regno restituere, cœgit. Est sanè quod cantemus, est quod Deo cum Rege Dauid gratias agamus. Noua hæc victoria, non sinit animos nostros torpescere, non sinit nos tacere, qui centum integris annis, non vincere, sed vinci solebamus: noua materia, noua victoria nobis affertur, nouum canticum pro illo veteri, quod totos centum annos, à Wituldi & Wladislai fatis exorsi, cum summo mœrore nostro, & lachrymis nostris, ad hanc vsq; inuictissimi Regis Stephani victoriam cecinimus, aures nostras assidue personet: quod mentes nostras ad diuinas laudes celebrandas excitet: quod eius misericordiam ante oculos nostros ponat: quod nouam Regis nostri Stephani virtutem, animi fortitudinem, pietatem, pectus inuictum, suaq; in nos ac regnum vniuersum beneficia celebret, ac laude debita exornet. Neq; enim illos imitari nos decet, qui omnia ea, quæ fortissimus, & inuictus Rex noster agit, vel repræhendere, vel eleuare non erubescunt; cum nisi diuinitus hic princeps nobis datus fuisset, non victoriam nunc caneremus, non triumphos ageremus; sed vt mancipia in turpissimam Tartari seruitutem abduceremur, sardiq; venales libidini Turcicæ exponeremur.

Ingrati

Ingrati animi est res magnas virtute et sapientia summa gestas calumniari, vel elcuare perdit salutem, vel inuito oblatam repudiare: utrumq; hoc vicium inquietæ mentis, & Dei beneficiorum ingratiæ aperte præsefert argumentū, ac canticum vetus inuidentiæ plenum canit: nouum, quo gratias Deo, pro tanta sua in nos, & regnum nostrum misericordia, agat, ac virtutem principis optimi, & inuictissimi, exercitusque nostri celebret, damnat, & auersatur. Quibus ut hac celebritate nostra indignis omnino repudiatis, cantici utriusque nostri rationes explicemus, Wituldo Lituaniæ duce, & Wladislao Jagielone Rege Polonorum, quorum uterque imperij sui fines propagarat, ac res magnas tum in Moschouia, tum in Tartaria, tum aduersus Germanos in Prussia, egerat, qui exteris nationibus, ac ipso terrore orbis terrarum Turcarum imperatori, terrorem nominis sui iniecerat, gloriamque Poloni nominis extulerat, vita functis: ad Casimirum natu minorem filium Wladislai sceptra regni delata. Nam de Wladislao adolescente inuicti animi, quem nobis Ungariæ regnum, maturius, quam nostris rebus utile esset, abreptum, Turcarum furori obiecit, nosque sua illa inuicta animi fortitudine priuauit, nihil dico: non diu hic princeps nostris præfuit rebus: & eo tempore præfuit, quo Moschus post Wituldi-victorias caput attollere nondum audebat. A Casimiro igitur, quo regnante Moschus insultare nobis coepit, exordiar. Nam dum ille in Prussico bello, quod annos tredecim continuos gessit, occupatur, ac ciuitates fœderitas à tyrannide Germanorum cruce si-

gnatorum, qui Mariani milites vocarentur, armis Polonorum libenter contendit, Germanorumq; insolentiae resistit; Joannes dux Moschorum, excusso iugo Tartarico, & plerisque ducibus Rusiae suo imperio subiugatis, Novogrodiū magnum, quæ ciuitas tum duci Lituanorum parebat, & centena milia aureorum annuorum ex fœdere dependebat, magna vi aggressus, unâ cum Rusiæ albæ plurimis munitionibus & arcibus, in potestatem suam redegit, ac toti Rusiæ atque Lituaniæ imminere cœpit. Cui cum Lituani bellum inferendum censerent, Casimirus laceſſendum bello non putauit, tum quod ducem illum ferocem, et bellis gerendis exercitatum, fortunisque auctum videret, tum quod ipse bello Prusico exhaustus esset, & ad alia bella spectaret. Quo successu ille elatus, ad maiori animum adiecit, Alexandro duci Lituanorum magno, genero suo, Scueriensē regionem latissimam & opulentissimam impunè eripuit, ac ita animo elatus fuit, ut vix ab eo impetrari potuerit, ut captiuos redderet. Nec hîc finis est: mox filius eius Basilus fraude Glinſcij Ducis, caput eius regioni: SMOlensium arcem occupauit, ac firmissimis præſidijs muniuit, maiorem tentaturus, nisi à Diuo Sigismundo, qui mortuo Alexandro regnare tum cœperat, infinitus eius exercitus, quem in ipsam Lituaniā immisurus erat, profligatus fuisset. Tum enim cœpit quietior esse: tum aliquid de sua illa audacia et fastu animi remisit, pacisque ac fœderum leges acceptas, à Sigismundo ad vitæ exitum seruauit: cuius filius, qui nunc in Moschouia Tyrannidem exercet, Augusto Polociam primū

mum eripuit, ac mox in Liucniam, ne quicquam ad Augusti
præsidia confugientem, ingressus, totam vastauit: arces plu-
rimas vel expugnauit, vel perditionem accepit, aut deser-
tas præsidij suis muniuit, pleræq; enim & arces, et vrbes,
ab incolis & milite, timore eius exercitus deserebantur.
Tantus creuerat, ignauia nostra Moschus, ut ne aspectum
quidem eius Germani ferre possent. Ac non solum Augu-
stum, quem contemnere soleret, laceßere ausus; verum etiã
Henricum Regem, quem tot, tantq; bella in patria gessiße
& confeciße sciebat, nihil metuens, ingressus in Liucniam,
arces Regias occupauit, totiq; Liucniæ præsidia imposuit,
ac incolas, ut alter Nabuchodonosor, ex ea regione abdu-
ctos, in extrema Moschouie transtulit, Tartarorumq; fu-
rori exposuit. Et hæc quidem sunt, quæ cum nostro summo
dedecore centum integros tulimus annos: hoc canticum eo
tempore cantauimus: prima hæc illa nostra elegia erat, quã
scriptam sanguine nostrorum, capto Nouogrodo, totq; the-
sauris inde exportatis, Joannes Moschus nobis cantandam
tradidit. Qui tum erat luctus nostrorum, qui terror, qui do-
lor, tanta, tam nobili, tam fructuosa principibus nostris ere-
pta ciuitate, ac tota planè regione illa, quam albam Rusiã
dixerunt, vel occupata, vel igni et ferro peruastata? Quid
animi tum nostris fuisse putatis, dum ex Russia occupata,
Lituanie hostis tã acer immineret; cum signa infesta in cã
iam iam inferret, eoq; progressus esset, ut ei Casimirum Ger-
manie victorem supplicem esse oportuerit? Qua quidem
Elegia à nobis decantata, alia nobis ab eodẽ hoste canenda-
mittitur?

mittitur? Nam occupata Seueriensi regione, & in vicinia castris hostium positis; non minor luctus, terrorq;, non Lituaniā solam, sed totum Regnum occupabat. Lituania vastata, hostis ille, & imperandi, & gloriæ, & auri argentiq; cupidus, in Poloniā inuasurus non dubitabatur; præsertim Russis principibus, ultrò se ad eum conferentibus, & sua dudentibus. Auxit hoc lugubre carmen prodita arx Smolensco; qua incolumi stante, non difficulter recuperari, à strennuo duce Sigismundo Seueriensis regio videbatur. Sed vel tum maxime territi fuimus, cum suspensis organis, & armis nostris sedentes, non ad flumen, sed domi ad pocula, captam Polociam audiuius. Quid enim expectabatur, quàm ut Wilna ipsa caperetur? Hæc erant illa cantica, quæ à Casimiro ad Stephanum usq; Regem patriæ nostræ patrem, cantauimus: nihil toto illo tempore afferebatur, præterquàm tot millia hominū cæsa, tot pueros, puellasq; stupratos, tanta seuitia hostem in captos usum, regiones igni et ferro vastatas, in miseram seruitutem captiuos abductos. Nam quæ à Tartaris passi fuerimus, illis regnantibus Regibus, non libet commemorare: testis est illa Podoliæ camporum vastitas: & nos ipsi ante aduentum ad nos Stephani Regis, ita territi fuimus; ut mensas etiam cibis instructas desereremus, ac fuga salutem quæreremus. Quot millia hominum tum in Tartariā abducta; quantum tum hostis ille, imò latro & prædo nobis insultauerit; quàm contemptum nomen Polonorum Turcia captiuis nostris repleta, reddiderit; tacere præstat, nec cætèrè volo persequi, quæ vobis

vobis perinde ac mihi nota sint. Ad nouum canticum uenio: vetus enim hoc centum annorum, animos vestros lugubri suo sono dissoluit, & aures ab audiendo vestras auertit. Ut primum Serenissimus Rex Stephanus diuinitus nobis datus, in regnum venit: ut primum illi clauum nauis nostræ tradidimus: ut primum sceptrum gerere cepit, Reip: & nostram salutem animo complexus, omnia consilia, curas, & studium suum ad regni propugnacula vertit: præsidia corrogare & rebelles ad officium redigere instituit: Gedanensibus bellum, cum ea copia, quæ vix satis esset Regiæ dignitatis tuendæ, & salutis domi custodiendæ, intulit: & profligatis copijs eorum, ea manu, quam dixi, urbem eorum obsedit, ac ad officium ciues illos redegit. Hinc nulla interposita mora, opem suam Liouoniensi uni ciuitatibus, quibus tyrannus Moschus immineret, reliquiasque eius regionis occupare contenderet, cum lachrymis implorantibus promisit, ac in eas regiones se contulit, Moscho bellum, repetitis ab eo rebus, intulit: ad Polociam exercitum duxit; ac ita obsessam oppugnauit; ut non multis interpositis hebdomadis in potestatem suam eam redigeret, principes captos abduceret, arces vicinas expugnaret, ac totam eam prouinciam occuparet, regnoq; restitueret. Quo in loco tanta Regis nostri constantia, tantum animi robur, laborumq; tolerantia adeò enituit; ut nec hosti, nec iniuriæ cæli, obscænoq; solo cesserit: videbatur planè non solum cū hoste configere, verumetiam cum ipso cælo, tempestatibus

G

assiduus,

ab iduis, ac terræ cæno, bellum gerere: ut interim rerum
et victus inopiam prætermittam. Docuit constantissimus
princeps, Polonos non eos esse, qui putabantur molles, et la-
borum non patientes; verum omnium periculorum contem-
ptores, inedie, tempestatum, omniumque vel cæli, vel loci
iniuriarum patientissimos, et victores. Quod bellum ab in-
famia illa, quæ, et Polocia capta, et Tartaris Podoliam
impune vastantibus, et tot millia hominum absque armis et
certamine ullo abducentibus, nobis irrogabatur, nos libera-
uit. Hic cepimus novum cantare canticum: hac victoria
audita, animus noster crevit: gratias Deo cum David age-
re cepit, et in ea verba prorupit: Cantate Domino canti-
cum novum: canticum illud nostrum vetus erat luctu et la-
chrymis plenum; novum hoc lætitiæ, et gaudium resonat:
ac corda nostra, mœrore, quo conficiebantur, deterso, hila-
ritate refecit, et animos nostros instaurovit. Redacta Polo-
cia in potestatem suam, rebusque ibi constitutis, non quiescit,
ut nostri olim solerent, victoriosus Rex: non contentus ani-
mus ille generosus hac una victoria. Munita igitur ciuita-
te illa, ad cætera recuperanda se infert, et intra vertentem
annum, urbem illam, quæ ab amplitudine pratorum, et
planicie amenissima, nomen accepit, Welkolucum aggre-
ditur, et tertio postquam obsessa esset die, expugnat, ac mu-
nitiones novas excitat, presidijque munit, et alias urbes
ipse cum suo exercitu oppugnat: ad alias, simili prædito a-
nimi robore, et laborum patientia, Magnificum virum
D. Joannem Zamosium, regni Cancellarium dimittit, ac
multas

multas munitiones difficilimas expugnat, & in potestatem
suam redigit, nunciumq; suæ victoriæ ad nos mittit, can-
tariq; Domino canticum nouum nos iubet. Quæ calamitas
hostem, cum parum moueret, ut potè eum, qui non solum
suorum salutem contemneret; sed etiam optimos & fortissi-
mos suos principes crudelissimè necaret, ad caput imperij
eius Serenissimus Rex noster exercitum ducit: Plescouiam
amplissimam urbem obsidet, & machinis muros verberat:
ac nihil eorum, quod ad capiendas & expugnandas vrbes
munitissimas necessarium esset prætermittit: erumpentes
ex vrbe cædit: muro perfoso, ac militem nihil cunctantem,
in apertum murum inuadere iubet; qui cum locum aper-
tum, turresq; vicinas, sua virtute occupasset, egregium
que specimen virtutis & fortitudinis daret, nihilò scius
tam picntissimus Rex, quòd videret, à multitudine hostium
pauciores suos, plures enim loci angustia non capiebat ob-
rui, & à puluere sulphureo per cuniculos turribus subiecto,
periculum eis imminere, nihil cunctatus cum reuocat, ma-
lens militum saluti consulere, quàm vel ipsam urbem eius
interitu capere. Nec satis visum est urbem premi, pars
exercitus in interiori Moschouie mittitur, omnia igni &
ferro vastantur, ut hoc modo vel hostem in aciem eliciat,
vel commotum clade suorum, ad pacem petendam adducat.
Quo factò cum hostem parum permoueri, discessumq; suum
hyemis timore, quæ in illis locis seuissima esset, expectare
videret; statuit in eodem loco hyemare, & hostem docere,
se non solum arma hostilia non metuere; sed etiam pruden-

tia sua, & patientia, hyemis asperitatem, & iniurias cœli
superaturum, ac iterum pars exercitus in penetralia Mo-
schouïæ mittitur, omnia hostiliter vastantur, ipse Moschus
ubi sit perquiritur. Quam animi constantiam Regis, cum
hostis videret; frustra se tergi-versando tempus absumere
iudicat: ac ne ipse in sua regia obsideatur, metuit, ad pacem
petendam serio animum flectit, moxq; opera legati Pontifi-
cij de fœdere agit. Quod fœdus ita confectum est, ut Polo-
niam nunquam, & Regis, & impendij ad bellum facti, pœ-
nitere poterit. Restituitur Liuania tota, traduntur arces,
cum machinis bellicis & armis: non solum Polocia relin-
quitur Regiæ potestati, verum etiam arces multò ante Po-
lociæ oppugnationem, à maioribus Moschi occupatæ, red-
duntur, ac Polociæ adiunguntur: sola Velkolucorum resti-
tutione, & solutione oppugnationis Pleseouïæ Moschus cõ-
tentus; cætera omnia Regi ut voluit concessit, ac de cæ-
teris iudicio Pontificis Romani se decertaturum promisit,
iudicio potiùs quàm armis, quibus olim orbem terrarum ter-
ruit, experiri exoptans contra inuictum Regem. Atq; hoc
est canticum nouum: quod ut cantemus Domino, Serenif-
simus Rex noster literis de victoria et pace confecta ad nos
datis, voluit. Cantemus igitur Domino, qui gloriose egit,
qui hostem nostrum terruit, ac ita terruit; ut nec aspectum
armorum regiorum sustinere potuerit. Cantemus Domino,
quòd miseram Liuiam è dura seruitute liberauit: quòd
nostram recuperauerimus: quòd fidem Catholicam primùm per
hæreticos, deinde per ipsum hostem, qui perfidiam hæreticæ
doctrinæ

doctrinæ puniuit, ex locis illis amotam, in suum locum pi-
 entissimi Regis nostri bonitate, restitui audiamus, ac pacem
 optatam habeamus. Cantemus Domino canticum hoc nouū,
 annunciemus gloriam eius, celebremus misericordiam in
 nos summam, ac ut eundem animum Regi nostro aspires,
 contra pestem orbis terrarum Tartaros, rogemus; ut ali-
 quando scelerum suorum, et tot prædarum, pœnas meritas,
 inclyto huic principi dent, ac gloriam eius augeant, nosq;
 metu tam fœdæ gentis liberemur. Cantemus canticum no-
 uum, cantemus cum Diuis Ambrosio & Augustino canti-
 cum eorum letissimum, Te Deum laudamus.

ORATIO III.

D. IACOBI GORSCII APVD SERENISSIMVM REGEM STEPHANVM LEO- poli Cracouiam reuersum habita.



QVOD A DEO OPTIMO MA-
 ximo assidue precati sumus, Sereniss: Re-
 gia Maiestas, Domine D. clementissime,
 dies hæc nobis representat, precësque no-
 stras, & vota nostra, pro Maiestate vestra
 suscepta, à Deo Patre exauditas esse, re ipsa testatur. Cum
 G iij enim

enim ab eo ipso tempore, quo Sacra *M. V.* susceptis regni
huius habenis, ab hac Urbe disceserit, semper *M. V.* ma-
ximis in laboribus & periculis grauissimis versari, belloq;
improborum ciuium, & sociorum excitato, teneri viderem-
us; nunquam destitimus Deo omnium misericordiarum
patri supplicare, votaq; pro incolumitate *M. V.* facere, &
summis precibus nostris ab eo exposcere, ut *M. V.* in hanc
ipsam urbem incolumem, rebus ex sententia confectis, bo-
ste represso, ciuib; proteruis in ordinem reductis, ad offi-
ciumq; reductis, reduceret: ac ut vniuerso regno ornando;
ita rei literariæ nostræ tuendæ incolumem, & felicem
conseruaret. Quod, quoniam ita ut precati sumus accidisse,
dies hodierna representat; Deo Opt. Max. qui nostras
preces audire dignatus est, gratias agimus: utq; *M. V.* ca-
dem incolumitate, felicitateq; frui perpetuò faciat; ornare
eius benignitatem non desinemus. Atq; equidem Sereniss:
Rex, Domine D. clementissime, cum omnes omnium ordi-
num homines, totumq; hoc regnū gratias meritu Deo Opt.
Max. agere debeant, quod *M. V.* & regni huius Regem
esse voluerit, & incolumem, felicemq; seruat; tūc verò
nobis, qui rei literariæ curam, studiūque suscipimus, maxi-
mè id conuenit; qui in *M.* vestra eas ipsas literas, & eam
bonarum artium excellentiam in lucere videamus; ut ea
cum splendore Maiestatis regi. c. certare videatur: nec mi-
norem dignitatem *M.* vestræ afferat; quàm ipsius Regni
maiestas affert. Vehementer certè omnes eas virtutes in
alijs adminantur; in quibus ipsi consequendis actiendis e-
laborant

laborant, vehementique studio erga illos accenduntur; quos
in eodem curriculo, in quo ipsi desudant, principem locum
tenere videant: Et exemplo eorum ad omnem illam rationem
effingendam excitantur: neque quicquam ad excitandos a-
nimos ad virtutem, studiaque literarum colenda efficacius,
et vehementius fuerit, quam principum studia; ad quorum
exemplum, orbem totum componi, gravissimè quidam pronū-
ciauit: ut cum primùm Augustus (cesar pœtices studium ada-
mare visus esset; statim Roma Græcos etiam ipsos, Et nu-
mero, Et præstantia pœtarum superare contendit: Nero
in theatro cecinisse visus, tota urbs studium canendi com-
plexa, nemoque repertus, qui principi illi cantando operam
suam ac ingenium probare nollet: Adrianus astra suspexit,
Mathematicorumque studia probavit, quis cœlum ipsum
conscendere non sit conatus? nullum certe calcar acrius est
ad incitandum homines, ad omne genus Et artium Et vir-
tutum; quam exempla principum. Cum igitur in M. vestra
tantus splendor eruditionis, Et literarum reluceat; quis e-
rit in hoc regno, qui ad complectendas et ingenuas artes, et
eos ipsos colendos, qui eas profiteatur, non excitetur? qui
literarum studia non complectatur? qui in eo genere excel-
lere non contendat? Est igitur, quod Deo Opt: Max: gra-
tias agamus: qui pro sua in hoc regnum benignitate, M. ve-
stram talem regem nobis et dederit, Et incolumem, felicemque
conseruat: est, quod felicem regressum in hanc urbem bona-
rum artium altricem M. V. gratulemur: est, quod Acade-
miæ nostræ gaudeamus. Quam quidem Academiam et rem
literariam

literariam nostram, ut benignitate sua M. vestra complectatur, & in suum patrociniū recipiat, per eas ipsas literas, quæ M. vestræ tantum splendorem inferunt, & tantam dexteritatem in rebus agendis, regnóque gubernando præstant, rogamus. Non equidem ignoramus Serenissime Rex, Domine D. clementissime, multos esse, qui nos, & totam huius Academiæ studiorum rationem, moresq; apud M. U. repræbendant, grauiusq; accusent, & plerique etiam crimina consingant: quorum oratio, crimenq; quale fuerit, si præsentibus apud M. U. nos accusauerint, facile apparebit: quæ de re pluribus agere, nec loci huius, nec temporis huius fuerit: certum accusatorem, certaq; crimina isthæc ratio postulat. Nunc M. U. supplices oramus, ut nostrum officium & salutationem hanc nostram, in meliorem partem interpretari, nosq; cum tota re literaria nostra, benignè in suum patrociniū recipere dignetur.

ORATIO V.

ORATIO V.
D. IACOBI GORSCII
GRATVLTORIA,

Apud Illustrem & Magnificum D. IOANNEM
ZAMOSIVM, Regni Polonię Cancel-
larium, à bello Moscouitico reuertentem,
& possessionem præfecturę
Cracouię: cernentem,
habita.



I DIVINVS ILLE PLATO,
*rectè diuinavit, cùm diceret, respublicas
tùm demum felices ac beatas fore, Illustris
ac Magnifice Domine, cùm eas aut Phi-
losophiæ amatores gubernarent, aut qui gu-
bernent, philosopharentur: certè nostra Respublica, optimo
iure beata & felix esse debet; quæ tota in potestatem eru-
ditissimorum virorum venit; quæ non modò regem omni
genere eruditionis excultum, & ingenuis artibus exorna-
tum, consequuta est; verùm etiam Senatores eos habeat;
qui nullum genus literarum, nullam partem philosophiæ, ac
scientiarum prætermiserunt. Inter quos illustris ac magni-
fice domine, primas partes, et locum principem facilè tenes,
& ut dici solet, familiam ducis: qui non solùm per transen-*

H

nam

nam opes philosophorum aspexeris; sed in penetralia eorum
 totis patentibus valuis ingressus, omnia penitus euolueris,
 omnia introspexeris ac pert. act. ueris, omnesq; illas sapien-
 tiæ eorum rationes, consilia, dogmata, et arcana eruditionis
 exbauferis. Nunquam certè eruditorem senatorem, regio-
 rumque consiliorum moderatorem tua Ill. M. hoc Regnum
 habuit. Superasti ingenio, superasti omni genere literarum et
 eruditionis, non modo eos, qui in Republi: gubernanda, &
 rebus agendis occupantur; verùm ipsos etiam Philosophos,
 ac omnium scientiarum professores, longè post te reliquisti:
 & tuo ipsius exemplum illis esse discipulos magistris suis me-
 liores demonstrasti: nosq; ut dicere non dubitemus, verum
 illud Græcum esse, *παιδείαν μαθητῶν καλίστην οὐκ ἐστὶν ἀλλὰ τῶν διδασκάλων* confir-
 masti. Nam cum illi semper in contemplandis illis erudito-
 rum opibus desideant, ac inter paucos eas explicent; Ill. M.
 vestri è tenebris illis eductas, in forum, in Rempublicam, et
 in lucem hominum eas transtulit: ac non solum inter subse-
 lia senatus et iudiciorum; verùm in ipso etiam solio Regum
 locauit: & quàm splendens ille eruditionis thesaurus Phi-
 losophorum fuerit; omnium oculis subiecit: omnibusq; quæ
 sit vis literarum, ver. e. q; philosophiæ, non solum in Republi-
 ca gubernanda, controuersis ciuium componendis, legibus
 firmandis, pace conseruanda, ciuib;que in officio retinen-
 dis; verùm etiam in bellis gerendis, hoste aggrediendo; vr-
 bibus expugnandis, foederibus conficiendis, planè nobis de-
 monstrauit: & legendis historijs, rebusq; literis mandatis
 perscrutandis prudentem et inuictum imperatorem effici pos-
 se docuit.

Ver. literarum

se docuit: ineptosq; eos esse, qui artibus ingenuis, qui Philo-
 sophiæ præceptis in republica gubernanda modicum, in bel-
 lis gerendis & disciplina militari nihil concedant, ostendit.
 Quos cum veterum exemplis, ac ipsius L. Luculli, qui cum
 rei militaris imperitus esse videretur, inter nauigandum,
 tum legendis veterum munimentis, atq; historijs peruoluen-
 dis, tum à peritis percunctando, summus imperator factus
 esset, refellere vix possemus, vetustissima enim & obsole-
 ta ijs viderentur; Ill: M. V. ad eam opinionem profligan-
 dam, nobis præstò adest: quæ viuo exemplo, ac rebus præ-
 sentibus indubitatisque, eam sententiam eorum falsam esse
 urgeat, eruditionemq; solidam, & rerum multarum & ma-
 gnarum, vetustatis, & rerum gestarum cognitionem, in Re-
 pub. tum pacis, tum belli tempore, magna præsidia principi-
 bus viris subpeditare, suo exemplo doceat, et tametsi non ver-
 bis, & oratione longa, eos, ad studia bonarum artium, phi-
 losophiæq; capeßenda, & arctius complectenda; re ipsa ta-
 men, & exemplo præfenti, rebusque magnificè à se gestis, et
 tota Repub: optimè moderanda hortatur: & quæ ornamē-
 ta, quas facultates rerum agendarum principibus in repub:
 viris præstent, demonstrat. Quis erit, qui cum Ill: M. V.
 in literis, Academijsq; etatem inuasegisse videret, bellis
 nullis interfuisse, antequam ad gubernandam rempub: ac-
 cederet. meminisset; tantam dexteritatem in bello gerendo,
 urbibus tum defendendis, tum expugnandis, hoste urgendo,
 omnia & prudenter aggrediendo, & felici, optatòque fine
 terminando, ab Ill: M. V. expectaret? qui imperium illi de-

H ij

ferri

*Viris eruditiss
Repub. committendis*

ferri vellet: qui non offensiones potiùs belli timeret; quàm
victorias speraret, ac scholasticam rerum gerendarum, &
rei militaris insolentiam non obijceret? Quam opinionem
omnium Ill: M. V. de se, egregiè, & prudentissimè, & repu:
tota gubernanda, & bello hoc Moschouitico difficili & ar-
duo gesto, & tot, tantisq; victorijs de potentissimo hoste repor-
tatis, refutauit: ac in eam sententiam animos hominum tra-
duxit; ut & sentiant & fateantur, nemini Respublicas
gubernandas commodiùs committi, quàm viris eruditiss,
& omni genere literarum perpolitis, posse: & nihil meliùs
regno, rebusq; nostris accidere potuisse; quàm quòd Serenif-
simus Rex noster, pro sua singulari sapientia, inter cate-
ros viros amplissimos, te præcipuè delegerit, cuius consi-
lijs, & prudentia, totam rem gereret: ac non solum domi,
civilibusq; negocijs; verùm etiam in bello & suscipiendo et
gerendo, fœderibus cum victo & supplici hoste firmandis,
& pace constituenda, vteretur, & quem summæ rei præ-
ficeret, cui omnia & sua, & totius regni consilia crederet,
& in cuius sapientia acquiesceret. Magni viri memoria
& nostra & maiorum nostrorum in hac Repub: fuerunt:
multi egregiè gesserunt: magna documēta excellentis inge-
nij sui rebus agendis dederunt: quæ tamen omnia, si cum ijs
quæ M. V. & domi, & in bello gesit, conferantur; mino-
ra, quàm existimarentur, appareant, & priorem locum ve-
stris & victorijs, & rebus gestis concedant, necesse est. Nā
quemadmodum Regia M. omnium regum gloriam suis re-
bus gestis, & prudentiam magnitudine ingenij sui adum-
brauit;

brauit; ita M. V. omnes eos, qui vel domi, vel in bello iisdem
 officijs, quibus M. V. nunc cum magna salute, & magno
 fructu regni huius fungitur, perfuncti sunt, superauit, &
 obscuriores suo splendore reddidit. Quod cur ita sentiam, e-
 numerandis tuis virtutibus, ac rebus gestis, me non temerè
 sentire facile demonstrarem; sed neq. tuam M. in os lauda-
 re, quod prudentibus viris & modestis molestum esse soleat,
 neque ita, vt par fuerit, egregia facinora tua, & in Remp:
 merita referre volo: aliud tempus illa, paremque magnitu-
 dini suæ orationem postulant; quàm hoc spatium nobis a-
 pud M. V. datum ferret. Non sumus equidem ignari esse
 nonnullos, qui omnia omnibus, imò sibi ipsis etiam, Ill: M.
 Vest: tantam gloriam, hunc tantum & dignitatis & rerum
 agendarum splendorem, inuideant, obtrectareque rebus tam
 magnificè gestis, & omnia in deteriore partem interpre-
 tari non erubescant; qui se solos magnos et Reipub: geren-
 de, imperatorijsque muneribus dignos iudicent; cum nihil
 minus, quàm hoc præstare possint, nisi fortè inuidere, &
 maiorum facta egregia, à quibus longissimè absunt, iactare,
 plenisque tubis sonare, & res arduas, tum domi Repub: gu-
 bernanda, tum in bello gerere, idem esse putent. Quibus li-
 uori suo relictis, ad Illustrem M. V. redimus: de cuius ta-
 men laude, dignitate, literarum cognitione, & in omni ge-
 nere eruditionis excellentia, in moderanda Repub: iurè di-
 cendo, iustitia firmanda, rebus in bello gestis, victorijs cla-
 rissimis, quæ in omnium oculis hærent, quæ bonos ciues, et
 virtutem, prudentiamque amantes, oblectant, inuidiæ verò

animi Polonoy.

oculos trunt, nihil nunc dicere constituimus; ne ea commemorando, & M. T. quam præsentem laudamus, & ijs clarissimis viris, qui T. M. adsunt, molesta oratio nostra sit. Illud certè tacere non possum, me tuas istas virtutes, eruditionem tuam, res et domi, et in bello, tam prudenter, tam constanter gestas admiratum, cum hos eruditos viros, qui me circumstant, tum verò iuventutem hanc, regni huius filios, & reipub: seminarium, ad Ill: M. V. deduxisse; tum, et virtuti tuæ tam excellenti, hisque præclaris artibus, quibus rempubli: nostrum conservas & auges, honor debitus à nobis redderetur; tum ut ijs ipsis iuuenibus, qui in eodem nunc curriculo literarum, in quo Illu: M. V. omnes vicit, decurrunt, exemplar I: M. T. proponerem: et exemplo eius præsentem, & vivo, ad studia literarum sedulò colenda, excitarem: quæq; præmia laboris sui & studiorum expectarent, ostenderem; & tuo diuino exemplo, tum ad literas, tum ad omne genus virtutis colendum, impellerem. Quod consilium nostrum, studiumq; nostrum erga I. M. T. ut benignè & prolixè accipias, rem literariam nostram, studia bonarum artium, quæ te ipsum tantum virum, & reipub: principem reddiderunt, ac tanto splendore rerum gerendarum illustrarunt, ames, augeas, & tuo patrocinio tuearis, nosq; & literis nostris, in tuo præsidio acquiescere facias, & felicitatis, beatitudinisque, quam Pictus ab eruditis principibus nobis pollicitus est, participes reddas, etiam atque etiam
rogamus. Dixi.



CRACOVIAE.
IN OFFICINA LAZARI, ANNO DOMINI.
M. D. LXXXIII.



939

